

稗史叢書之四

太平天國軼聞

上海進步書局印行

太平天國軼聞

卷四

太平天國布告天下檄

檄云。爲實情勸諭。棄暗投明。共出迷途。各保福祿。夫天下者中國之天下。非滿洲之天下也。寶位者中國之寶位。非滿洲之寶位也。子女玉帛者中國之子女玉帛。非滿洲之子女玉帛也。慨自明季。凌夷滿虜。肆逆乘釁。竊入中國。盜竊神器。而當時官兵人民。未能共憤義勇。驅逐出境。掃清羶穢。反致低首下心。爲其臣僕。迄今二百餘年。濁亂中國。鉗制兵民。刑禁法維。無所不至。而一切英雄豪傑。莫不爲之制而甘爲之用。是則令人惡之痛心。恨之刺骨者矣。然從前爾等官兵爲滿所用。本係被其迫脅。且前時未逢聖主首出。無所依歸。爾等又不能共創義舉。自不能舍國他適。亦猶黑暗之中。未睹天日。暗中摩搔。不辨方位。何能不誤入迷途。以待天曉乎。茲者三七之

運告終。九五之人已出。恭維天父天兄。大開天恩。命我真聖主天王降凡御世。用夏變夷。斬邪留正。誓掃胡塵。拓開疆土。此誠千古難逢之際。正宜建萬世不朽之勳。是以不時智謀之士。英傑之儔。無不瞻雲就日。望風景從。誠深明夫去逆效順之理。以共建夫敬天勤王之績也。惟是爾等官民人等。雖曾爲滿官滿兵。亦皆是天父之子女。不過從前誤爲滿用。不能不聽其驅使。助滿爲害。跡雖可恨。情實可原。今旣逢真主當陽。自宜棄暗投明。共歸正道。滌舊染之汚俗。作天聖之子女。且我天皇恩德高厚。援救蒼生。果能敬天識主。傾心歸附。莫不一視同仁。無分畛域。本軍師等誠恐爾等執迷不悟。受滿蠱惑。用是不惜援手。竭誠拯溺。特將順逆之大原。利害之實跡。爲爾等明諭之。夫滿洲之籠絡漢人。首以官職。爾等試思。凡有美缺要任。皆係滿人補授。而衝繁疲難者。則以漢人當之。使之虧空挂誤。動輒得咎。名雖爲官。何異桎梏。若夫陞遷調除。滿人則通問保薦。各踞顯要。一屬漢人。不遭批駁。卽受阻隔。縱使功績赫奕。終亦非賄不行。至兵則滿兵雙糧。漢兵單餉。一遇戰陣。則漢兵前驅。滿兵後殿。

故每天兵臨壓。立成齏粉。其肝腦塗地。死首堆山者。惟漢兵最多。而滿兵在後。雖前鋒失利。而鼠竄奔逃。故世俗謂鄉勇爲擋死牌。而呼漢兵爲替死鬼也。至於頒賞犒賜。則又滿兵多得。而漢兵無與焉。且爾等之所以拋父母離鄉井。被霜觸暑。出生入死者。非欲圖建功名耶。而滿虜於軍中功名。則又無所定準。任是紅藍白頂。皆是虛無假借。故俗以軍功頂戴。謂之太平消。蓋以急則與之。緩則奪之也。爾等又何苦以百戰之餘生。而博此虛假之名器乎。且千里徵調。飛符迅急。千山萬水。跋涉從戎。露宿風餐。辛勤畢備。身未建夫功名。生已喪夫鋒鏑。良可惜也。况爾等爲兵爲勇之人。半以平日誤作非爲。是以借兵勇爲逃死之地。其視爾等如同蛇蝎。而滿虜又嚴其法網。多方責治。而使一旦歸鄉。人卽共相誅殛。非活埋諸土。卽生棄諸淵。此實本軍帥在粵時。並躬歷八省。實所親見。爾等無論不能躬致顯榮。卽或稍有附進。亦終不能榮歸故鄉。諺有之。富貴不歸鄉。如衣錦夜行。乃爾等從軍。則有死無生。還家則以生就死。容身無地。死而後已。午夜自思。曷堪悲痛。是皆爾等爲滿所用。故乃一至於

此。然此不過就爾等爲兵勇者大約言之。至於荼毒生靈。貽害黎庶。則又截南山之竹。書罪無窮。決東海之波。流毒無盡者矣。故滿虜之世仇。在所必報。共奮義怒。殲此醜夷。恢復舊疆。不留餘孽。是則天理之公。好惡之正。何反含毒忍恥。爲之奴隸。違背天朝。不思歸附。是何異購安宅而不居。舍正路而不由。嗟嗟可恨也已。爾等須知我天朝廓達大度。胞與爲懷。不分新舊兄弟。皆是視同一體。大功大封。小功小賞。上而王侯將相。下而兵士婦孺。得使衣食得所。居處相安。有家者和樂致慶。無家者婚姻及時。雖在軍旅之中。仍不廢家庭之樂。以視爾等流離異域。橫死疆場者。真不啻有天淵之別也。況於共扶眞主。各建殊勳。千載一時。功名何既。矧太平在即。不三四年。俱爲開國勳臣。爾時分列茅土。衣錦榮歸。此皆大丈夫之所爲。爾等何又昧於徒速。而不早圖變計乎。天朝天恩高大。往者不追。果能悔悟來歸。定能量材錄用。弗以曾爲滿官。自懷疑懼。回首及早。速出迷津。本軍帥實有厚望焉。儻仍至死不悟。甘爲滿奴。轉瞬天兵大至。噬臍無及。爾時悔之。亦已晚矣。本軍帥念切中土被滿披靡。故實

情明諭。雖痛切不知所言。孰得孰失。當自思之。速先成之。識勿貽後至之誅。庶無負本軍帥等諄諄曉諭之至意。布告爾衆。咸使聞知。

太平天國詔

此詔爲信陽柴君蘭亭。從秀全營中抄出。詔曰。朕祖洪武掃蕩羣夷。克復中原。開三百年之丕基。造億萬姓之厚福。此誠三代以來之盛主也。不幸至我懷宗。闖賊猖獗。奸黨開門。致有甲申之變。爾祖乘我之亂。包藏禍心。篡我之朝。竊奪神器。弘光被弑。忠臣死者千餘。宗室遭殘。親族亡者數萬。當此時也。地裂天崩。山枯海涸。爾胡逆賊。我世不共戴天之仇也。况夏爲夷變。二百年不見日月之光。漢受滿欺。六七世常聞腥膻之氣。弑兄弑叔。迹類豺狼。納妹納姑。行同狗彘。賣官鬻爵。士子之誦讀何庸。加賦勸捐。庶民之脂膏已竭。犯人不薙髮。是欺漢人爲囚。狀元不招親。是視漢人爲寇。不封王。不爵位。是忌漢人有柄。不將兵。不樹帥。是畏漢人有權。名雖君臣。實則陌路。鹽分南北。法失重輕。貪官污吏。滿寰區。處處是殺人利刃。善士良民。遭荼毒。人人懷

切齒深仇。以致旱虐連年。水災屢降。民不聊生。人皆思亂。爾忝居大位。尙不側身修身。而猶縱淫貪欲。置民瘼於罔聞。謂天威不足畏。此誠昏庸無道之極。所謂四海困窮。天祿永終者此也。今朕非他。乃大明太祖之後裔。弘光皇帝七世孫也。名正言順。天與人歸。一爲祖宗復仇。二爲蒼黎發暴。謀臣如雨。戰將如雲。大興湯武之師。用慰雲霓之望。鋤其酷虐。救民於水火之中。修我戈矛。取殘若鷹鷂之逐。旌旗蔽日。船筏彌江。士卒爭先。水陸並進。天塹無難飛渡。投鞭亦可斷流。將軍所至。迅如掃葉之風。兵帥所臨。震如當空之霹靂。車威整肅。號令森嚴。耕市不驚。秋毫無犯。簞食壺漿。迎之者喜。其先至。翹首引領。望之者恨不速來。至有摧枯之威。破竹之勢。趁首夏之清和。分兵西往。據高秋之逸爽。遣將北征。傳檄江南。連兵河朔。分兵進討。問罪燕京。共梟胡逆之頭。以洩呼天之恨。凡屬滿營生擒者。割其股而吸其髓。但係旗下死亡者。食其肉而寢其皮。滅盡胡兒。克復中原之土。安全黎庶。重覩滿（此字疑誤）世之天。凡我士民。無詐無虞。同心同德。永登仁壽域。長享太平春。欽此。

洪氏之檄告

洪秀全攻長沙。圍其城五十日不克。夜又解圍北趨。途中出示曰。

奉承天運。太平國總理軍機。天下大元帥萬歲。洪爲愷切曉諭。伐暴救民事。照得天下貪官。甚於強盜。衙門酷吏。無異虎狼。皆由人君之不德。遠君子而親小人。賣官鬻爵。壓抑賢才。以致世風日下。上下交征。富貴者稔惡不究。貧窮者銜冤莫伸。言之痛心。殊堪髮指。卽以錢漕一事而論。近加數倍。三十年之糧免而復徵。民之財盡矣。民之苦極矣。我等仁人義士。觸目傷心。故將各府州縣之賊官狼吏。盡行除滅。以救民於水火之中。刻下大兵雲集。廣西已定。湘鄂二省以及江西江南一帶。不得不先行曉諭。凡我百姓兄弟。不必驚慌。農工商賈各安生業。富貴者須備辦糧食。助吾兵餉。多寡數目。親自報明。各給回借券。以憑日後清償。你等如有勇力者。智謀者。宜同心協力。共襄義舉。俟太平之日。各予榮封。現在各府州縣官員。逆吾者斬。順吾者生。着先赴還原籍聽候。他日起用。其餘豺狼差役。概行勦除。懸首示衆。恐有流賊土匪。藉

端滋事。准爾等指名投稟。俾加懲治。倘有鄉民敢助清官爲虐。以敵吾之士卒者。無論各府州縣村鎮。天兵所到。必予誅夷。凜之愼之。毋違特示。

其二

咸豐帝知洪氏大勢已成。橫行無敵。心甚驚憂。故慮次催徐廣縉赴西追剿。然徐則故意遲遲其行也。洪黨於十一月初三日克洞庭湖之岳州府。各路防堵皆空。洪黨先使八十餘人。坐大船二隻。小船四隻。十一月初九日。駛抵湖北之漢陽府。在鸚鵡洲泊船。等候大隊齊到。攻取漢陽。十二日。鸚鵡洲之洪兵。見漢陽城外清軍。皆住箭營內。有一大膽漢倡議曰。清兵頗畏我輩。我等若先去攻之。可立克也。於是八十餘人。各携鳥鎗軍器火藥包。令一人手執大旗先登岸。高聲吶喊前進。城上清兵大驚。以爲洪氏大隊人馬前來攻城。各放鳥鎗數聲。卽棄械而遁。洪兵趕到城邊。擲藥包數十個。火着民房。烟燄迷漫。官兵已無踪跡。遂乘勢破城。分佔各門。後大隊到。乃入却漢陽府衙門。掠取倉庫。命人焚葉名琛之村。掘其祖墳。一面出示安民。示曰。

大漢軍師兼理內外政教。統屬官吏軍民開國丞相左。爲上諭宣布中外事。照得安邦定國。弔民非所以害民。發政施仁。戡亂非所以擾亂。村鄉市鎮。不用驚惶。士農工商。各安本業。夷滿當滅。皇漢當興。久合必分。亂極復治。天地古今。循環自然之理也。茲因君弱而暗。臣暴而貪。殘酷日甚。我民何堪。況且朝中文武。權重者盡屬旗滿之人。外省職員。戶位者無非捐納之子。士人雪窗勤學。終屬徒勞。難抒抱負。雖懷經濟之才。安有展用之日。朝無善政。野多遺賢。大臣盡是貪賍。小吏能無索賄。上有好者。下必甚焉。故張家祥等。遂致阻截江河。擾亂鄉里。逞其虎狼之性。魚肉生民。肆其狐狸之淫。閭里受害。如渠等類。聞風而興。招集匪人。凌暴黎庶。沿江取稅。到處搶掠。商民當之者。迎刃而倒。士庶聞之者。望氣而逃。官司不肯究詰。貓鼠竟至同眠。嗟嗟我民。際此聊生。何賴。是以我聖神文武皇帝。心懷惻隱。日夜焦憂。用是聚天下之義士。弔民伐罪。大舉義旗。以清妖孽。八月初一。兵入永安。陛下待庶民如保赤子。本官深體陛下之意。自從出兵以來。不許部下妄搶一物。妄傷一人。倘有抗拒不遵。本官定

必重究。各省州縣地方所在。必宜更革。編髮左衽之非。奮厥乃心。成茲偉績。效力有功。定給爵賞。且俟東南底定。然後戮力北燕。擒獲虜酋。問其累世猾夏之罪。光復中華。一統之休。賞德論功。明刑設罰。我國家自有常典。爲此特示。凜遵毋違。

林彩新諭青岩檄

天朝九門御林開朝勳臣殿前忠誠一百六十二天將林。爲勸諭四民。急散團練。速卽投誠。以保身家事。照得亂極思治。順撫逆誅。理固然也。緣爾浙省。經我侍王雄千歲。自去年克取。爾民均皆向化。傾心共立版圖。各郡邑已委大員鎮守。招徠安撫。民皆耕讀如恒。共樂堯天。到處秋毫無犯。爾東邑小縣。何得誤聽謠言。信妖蠱惑。甘心去正歸邪。胆敢扶老攜幼。躲避珊瑚各都團練壯丁。糾衆拒敵。以七尺身軀。抗數十萬之王師。竟不思父母乳哺之恩。未報兒女教養之事。未了一旦持戈而秉旂。頓作刀頭之鬼。豈非誤信妖言。招敗家喪命之禍哉。本天將恭承旨命。領兵出京。原欲掃盪四方之醜類。安撫淳良之百姓。於今春師抵爾省。蒙我侍王雄千歲派令進徵。欲

復臺溫而通處仙。取寧波以靖浙地。豈知雲縉小邑。妖心不足。胆敢結連匪衆。強抗王師。本天將一鼓誅滅淨盡。諒爾民共見共聞。今欲直取臺溫。與爾民共躋仁壽。國恩浩大。王師若霖。爾青巖區區小寨。焉能抗拒天兵乎。本天將懷念爾民。久向天朝。蓄髮二載。不肯重加荼毒。聞爾民畧有漏網殘妖。故令本部士卒前來掃盪。以分民憂。與爾民無干無涉。王師臨境之日。但願鄉員士庶。壺漿以迎。倘有糾衆聚黨。潛藏青岩穴內。壯者持旛抗敵。斬一丈而屍橫遍野。血流成河。老弱奮力嘶喊。誅一處而室家罄空。鷄犬受戮。獨不思團練可以保家。團練即所以敗家。貪圖六七品之軍功。拋棄億萬人之性命。可憐父子離散。劬勞之恩。難以報。尤甚夫妻拋棄。魚水之情。卽時休。本天將體天父好生之德。天兄救世之心。天王愛民之念。侍王撫恤之情。有不忍不教而誅者。爲此特行勸諭。仰爾各鄉員士庶人等一體知悉。務宜急散團練。痛改前非。勿以當妖爲榮。勿以團練爲事。照依舊規。請令設局投誠捐糧。納貢輸餉。安業如常。貿易相依。有智勇過人之輩。投營立功。共圖大業。封妻蔭子。可謂棄暗投明。

之豪傑。其餘百姓。歸家樂業。各安本分。春祈秋報。以保身家。永享昇平之真福。倘仍執迷不悟。甘心從妖。本天將再興大師。將爾等盡行勦洗。玉石俱焚。那時悔何及矣。自諭之後。投誠之日。倘有不法官兵。下鄉姦淫擄掠。無端焚燒者。准爾民捆送卡員。按依天法。輕則枷號杖責。重則梟首遊營。本天將言出法隨。決不寬恕。爾四民各宜凜遵。咸使知聞。切切此諭。天父天兄天王太平天國壬戌十二年十一月

萬大洪告示

萬大洪告示。見某氏太平天國史中。今錄如下。奉天承運太平天國總理軍機都督大元帥萬大洪。爲剴切曉諭。伐暴救民事。照得天下貪官。甚于強盜。衙門活吏。無異虎狼。皆由虜朝之柔懦。遠君子而近小人。賣官鬻爵。壓抑賢才。以致利風日熾。上下交征。富貴者縱惡不究。貧窮者有冤莫伸。言之痛心。殊堪髮指。卽錢漕一事。近益數倍。三十年之糧銀。免而後再征。民之財盡矣。民之命苦矣。我等仁人善士。觸目傷心。故將各府州縣之賊官狠吏。盡行除滅。救民于水火之中也。刻下大兵雲集廣西。已

定長州太平。將近江西等處。不得不先行曉諭。凡我百姓。不必驚慌。農工商賈。各安生業。富貴者須備辦糧食。助吾兵餉。多寡數目。親自報明。各給回借券。以待日后清償。爾等如有勇力者。智謀者。同心竭力。共成美舉。俟承平之日。幸資榮封。現在各府州縣官員。逆吾者斬。順吾者昌。著卽付印回籍。其餘豺狼差役。概行勦除。懸首示衆。恐有流賊藉端滋事。爾等指明具投。隨時征討。倘有鄉民。敢助滿賊官兵。以敵吾之士卒者。無論各府州縣鄉村。盡行洗滅。凜之慎之。毋違特示。

錢江上洪秀全書

伏以大王起事之初。笄髮易服。欲變中國二百餘年索虜之俗。志謀遠大。創業非常。其不以武昌爲止足之境明矣。今日之舉。有進無退。區區武昌。守亦亡。不守亦亡。與其坐而待亡。孰若進而冀其不亡。不乘此時爲破釜沉舟之計。長驅北上。徒苟且目前。懈怠軍心。誠無謂也。清初吳三桂舉兵之時。不數月而南六省皆陷。地廣衆附。稱帝自雄。可謂驟矣。然遣將四出。不越湖南一步。搶攘十數年。終抵滅亡。前車可鑒也。

或謂武昌依阻江湖。襟帶漢湘。扼險自固。然後間道出奇。以一軍出鄖陽。攻潼關。趨陝西。擾彼關內外。地以一軍出荊州。攻夔慶。趨成都。先取四川爲基業。不知秦隴四塞。地錯邊鄙。人悍物嗇。糧食維艱。且重關疊隘。縱我攻必克。大費兵力。勞而莫必。固宜後悔。得不償失。盡棄前功。況削其肢爪。究不如洞其心腹之爲愈也。至四川小局。昔日已形在蜀。漢當日先以諸葛之賢。繼以姜維之勇。六出九伐。不得中原寸土。且江南水邦。賴吳據之以爲唇齒。聯絡援應。尙難得志。況今日哉。天下財賦。大半萃於東南。當此逐鹿於寧謐之中。而欲一以隅敵天下。江決其無能爲也。以江愚昧。不若舍西而東。金陵建業。古帝王建都之所。鳳泗汴梁。眞聖人龍起之方。江謂宜先取江寧。以裕軍餉。繼取汴梁。以爲犄角。終趨濟南。以圖進取。扼齊魯之運河。可以坐困通倉之食。截南北之郵轉。可以牽制勤王之師。然後約我老萬。以攻梁厦。檄我丹山。以攻溫處。所過則秋毫無犯。所至則招納賢能。而民有不完髮易服。簞食壺漿以迎者。江未之信也。南京不下。則江東不得渡。豐沛不陷。則青兗不得進。山東不搖。則燕京

不得戒嚴。糧漕困於內。人心離於外。孟子所謂不嗜殺人者能一之。正此時也。今日之事。勢成騎虎。萬一頹情。轉致蹉跎。成敗之機。間不容髮。我軍遠離鄉井。志切從龍。聞進則同心同力。踴躍爭先。聞退則畏首畏尾。存亡莫保。戎衣兩截。捨命冲陷。渡湖而後。無復有南還之望者。皆欲立功名。享富貴。誓九死以垂勳。不願一生以伏莽也。誠因時而勵之。羣策羣力。一可當百萬。戰何敢辭。時哉不可失。席前之箸。江願借而籌之。馬上之策。江願指而先之也。俟南京底定之後。招集流氓。秣厲兵馬。扼衆南堵。揮軍北上。左出則趨江北以進戰。急則可調淮陽之軍以繼之。右出則握河海以拒敵。急則可調開歸之軍以應之。南陽汝寧。則發一軍以突其西。略取河內州縣。乘勝入晉。直抵燕冀。無返旆。杭嘉金衢。則發一軍以冲其東。應我沿海舟師。相機定浙。伺間窺閩。無輕舉。兵不止於一路。計必出於萬全。內固江南之根本。外安新造之人民。修我政理。宏我規模。則西而秦蜀。南而豫粵。可傳檄而定。此千古一時也。自漢迄明。天下之變故多矣。分合代興。原無定局。晉亂於胡。宋亡於元。類皆恃彼強婪。賺主中。

夏然種類雖異。好惡則同。亦不數十年奔還舊部。從未有毀滅禮義之冠裳。削去父母之毛血。儀制甚匪。官人類畜。中土何辜。久遭荼毒。若斯之酷者也。帝王自有眞天。意果何屬。大任奮興。能不勗諸。更有期者。旌旄所指。與民無逆。提劍號召。是漢卽從。使天下咸知今日之舉。並非無名之師。亦使天下咸知中國之仍爲華。不皆終於夷。王者發軔。彰明較著。陣堂旂正。不容秘詐。軍行令肅。所至如歸。彼縱有滿洲蒙古。殫心竭力之臣。吉林索倫。精騎善射之旅。苟不望風投順。我百姓其許之乎。方今天下。以利爲治。上下交征。風俗之壞。亦已極矣。人心之憤。亦已久矣。納賂損名。覷然民上。搢紳之途。亦已污矣。而英雄豪傑之士。抱負名節。伏處於山林莽野之間者。亦已困矣。磅礴鬱勃之氣。積久必宣。有眞人起。孰不欲去其舊染之污。拭目而觀新命之鼎哉。佈置調度。此其大略。欲成基業。願勿他圖。夫草茅崛起。締造艱難。必先有包括宇宙之心。而後有旋乾轉坤之力。知民之爲貴。得民則興。知賢之爲貴。得賢則治。如漢高祖之寬洪大度。如明太祖之夙夜精勤。一日。天人合應。順時而動。事機之來。無可